

# Harpañ Euskariz



**Abaoe miz bremañ ez eus bodadoù "Euskal Herriaren Lagunak" e Roazhon, Brest ha Naoned. Ur sizhunvezh a genskoazell etrebroadel gant pobl Euskadi a vo kinniget gant bodad Roazhon etre ar 17 hag ar 27 a viz C'hwevrer. E penn an traoù emañ David Ruaud.**

## Petra eo labour izili bodadoù Euskal Herriaren Lagunak ?

Brudañ, reiñ da anavezout ar stourm zo en Euskadi evit ar brizonidi bolitikel, strewet ha pell eus o bro. An dalc'h zo dont a-benn da gas ar brizonidi tost d'o familhoù, lezel ar re glañv da vont er-maez ha dieubiñ ar brizonidi a vez miret en toull daoust dezho bezañ graet o frantad bac'h ofisiel. Kelaouiñ tud ar vro a reomp hag an dilennidi ivez.

## Pet a dud a gemer perzh ?

Un 30 den bennak e bodad Roazhon.

## Perak ho poa divizet sevel ur bodad ?

Pa raen war-dro an davarn *Le Comptoir Basque* [e Roazhon] em boa bet tro da gaozeal gant kalz tud eus Euskadi, deuet da welet ar prizoniadezed [s.o. pennadig a-zehou]. Ur vignonez dezho, eus Bilbo, he doa displeget din petra eo ar bodadoù-se. Soñjet 'm eus e oa poent din ober un dra bennak evit ma bro, rak ganet on bet e Baiona ha ne'm boa graet netra

a-raok evit Euskadi. Pouezus e oa evidon. Gant plac'h Bilbo on bet e Brest evit kinnig penaos emañ gant ar brizonidi.

## Peseurt darempred ho peus gant tud Euskadi ?

Holl bodadoù Euskal Herriaren Lagunak ar bed a gemer perzh er gevredigezh etrebroadel Askapena hag a zo e penn ar c'henurzhiañ. Bet on en emgavioù etrebroadel e kêr Altsasu en Euskadi, e-pad tri devezh er bloaz paseet da skouer, ha tro am eus bet da gaozeal gant tud bodadoù Bourdel ha Pariz ivez.

## Ur sizhunvezh ispisial a vo e miz C'hwevrer. Petra e vo ?

"Sizhunvezh ar genskoazell etrebroadel gant pobl Euskadi" an hini eo. Kinniget e vez bep bloaz dre ar bed gant ar bodadoù, e Mec'hiko, Pariz, Berlin... Hag er bloaz-mañ e vo e Roazhon ivez. Filmoù a vo bannet, ur brezegenn gant ar skolveuriad ha skrivagner Jean-Pierre Macias.

Komzoù dastumet gant M.L.

Evit gouzout hiroc'h : [WWW.ASKAPENA.ORG](http://WWW.ASKAPENA.ORG) ha gwelet pajennoù Facebook ar bodadoù : Euskal Herriaren Lagunak Naoned | Euskal Herriaren Lagunak Brest | Euskal Herriaren Lagunak Roazhon.  
Pgz : 06 63 69 98 82 (David Ruaud)

## Prizionadezed Roazhon



Ha gouzout a ouzoc'h ez eus c'hoazh un nebeud izili eus ETA e kreizig-kreiz kêr-benn velestradurel Breizh ? Diwar an 800 den bennak toullbac'het evit bezañ bet oberiant en ETA pe er strolladoù politikel berzet gant Madrid, ez eus en em gavet peder maouez e toull-bac'h Roazhon, unan eus ar re nemete a zegemer merc'hed hir o c'hastiz. N'eo ket ar wezh kentañ da unan anezhe da nebeutañ ober un tamm tro er vro. Argi Perurena (40 vloaz) a orin eus Hendaia zo bet kondaonet da 18 vloaz evit bezañ kemeret perzh e taol laeroñsi Plevin e 1999, a-gevret gant paotred an ARB. Lorentxa Beyrie zo ivez a orin eus hanternoz Euskadi, e Kanbo. Bez' he deus da dremen 27 vloaz en toull. An div all zo liammet ouzh kreisteiz ar Pireneoù. Lola Dolores Lopez Resina zo bet ganet er broioù Katalan 50 vloaz zo. Eno e krogas da stourm e strolladoù evit Katalonia dizalc'h, da heul ez emezelas da gomando Barcelona ETA. Kondaonet eo bet da 19 vloaz toullbac'h. Ane Miren Alberdi he deus hi da vezañ bac'het e-pad 15 vloaz.



Bretoned zo n'o deus ket ankouet al liammoù kreñv etre an div vro, setu ma oa deuet ur 80 bennak anezhe dirak mogerioù uhel toull-bac'h Roazhon, e-kerzh nozvezh Kalanna. Gant bannieloù Breizh, Euskal Herria ha hini ar broioù Katalan o deus saluded ar peder flac'h, lakaet fuzeennoù da strakal ha kanet forzhik luganioù.

G.R.

## 110 000 a dud e Bilbo

Ur mor a dud ? Ul lanv divent ? Start eo dibab ar gerioù a glotfe ar gwellañ evit deskrivañ an engroez a oa e Bilbo d'ar Sadorn 7 a viz Genver. 110 000 den o doa dibunet da-heul galv familhoù ha skoazellerien an doullbac'hidi, evit goulenn ma vo adkaset prizonidi bolitikel Euskadi betek toullbac'h o bro. Meur a sindikad hag a strollad politikel a oa deuet da harpañ anezhe evit embann n'eus abeg ebet ken da chom hep strollañ an 800 prizoniad bennak strewet e prizonioù Spagn ha Frañs, kas anezho en-dro d'o bro, dieubiñ ar re glañv hag ar re o deus graet an div drederenn eus o c'hastiz. Abalamour da arsav brezel ETA, disklêriet d'an 30 a viz Here 2011 e oa bet galvet da zibunañ. "*Kolosala izango da*" (bras-meurbet e vo) o doa embannet aozerien ar vanifestadeg. Ne oant ket faziet. A bep seurt tud a oa. Kozh ha yaouank, tud ar vro pe tud deut eus pell evel un toullad Madridiz, Andaluziz ha Katalaned. Dilennidi a oa ivez, eus an tu kleiz dizalc'hour betek ar strollad broadelour kozh PNV.

Ha klevet e vo o galv gant gouarnamantoù Pariz ha Madrid ? Den ne oar. Un dra zo sur bepred, start eo bet da Yann Vreton lenn pe klevet an disterañ meneg eus an darvoud dreistordinal-mañ er c'heleier gall.

G.R.

